

VENDIM
Nr. 386, datë 6.5.2015

**PËR KRIJIMIN DHE MËNYRËN E ORGANIZIMIT E TË FUNKSIONIMIT TË
INSPEKTORATIT SHETETËROR TË UJËRAVE**

Në mbështetje të nenit 100 të Kushtetutës, të neneve 11, pika 2, e 51, pika 3, të ligjit nr. 10433, datë 16.6.2011, “Për inspektimin në Republikën e Shqipërisë”, dhe të ligjit nr. 90/2012, “Për organizimin dhe funksionimin e administratës shtetërore”, me propozimin e ministrit të Bujqësisë, Zhvillimit Rural dhe Administrimit të Ujërave, Këshilli i Ministrave

VENDOSI:

I. KRIJIMI I INSPEKTORATIT SHETETËROR TË UJËRAVE

1. Krijohet Inspektorati Shtetëror i Ujërave (në vijim ISHU), si institucion qendror publik, buxhetor, në varësi të ministrit përgjegjës për ujërat.

2. Ministria përgjegjëse për ujërat mbështet funksionimin efektiv të ISHU-së. Në këtë përgjegjësi nuk përfshihet drejtimi operacional i veprimtarisë së inspektimit.

II. MISIONI DHE FUNKSIONET

1. ISHU-ja ka për mision garantimin e respektimit të kërkesave ligjore në fushën e mbrojtjes së ujërave.

2. ISHU-ja është përgjegjëse për të gjitha funksionet e inspektimit në fushën e ujërave në përputhje me përgjegjësitë e ministrisë përgjegjëse për ujërat.

3. Përveç sa parashikohet në pikën 2 të këtij kreu, ISHU-ja është përgjegjëse për çdo funksion apo kompetencë tjetër të përcaktuar nga legjislacioni në fuqi për inspektoratin shtetëror që mbulon fushën e ujërave.

4. ISHU-ja ushtron juridiksionin e vet territorial në të gjithë territorin e vendit.

III. MËNYRA E ORGANIZIMIT DHE E FUNKSIONIMIT TË ISHU-SË

1. ISHU-ja organizohet në dy nivele: në atë qendror dhe rajonal, ku këto të fundit janë për çdo rajon të vendit.

2. Marrëdhëniet e punës për punonjësit e ISHU-së rregullohen nga ligji nr. 152/2013, “Për nëpunësin civil”, të ndryshuar.

3. ISHU-ja drejtohet nga kryeinspektori, që është titullari i institucionit. Në kuadër të funksioneve dhe detyrave të ISHU-së, kryeinspektori ushtron këto kompetenca:

a) përfaqëson inspektoratin në marrëdhënie me të tretët dhe është përgjegjës për organizimin e bashkërendimin e punës për funksionimin, cilësinë dhe efektivitetin e veprimtarisë së këtij inspektorati;

b) zbaton e administron buxhetin e miratuar të ISHU-së, në përputhje me legjislacionin në fuqi, dhe përgatit projektbuxhetin për vitin e ardhshëm, të cilin ia përcjell ministrit përgjegjës;

c) nxjerr urdhra për mbarëvajtjen e vazhdueshme të punës për përcaktimin e procedurave, kompetencave, detyrave dhe funksioneve për kryerjen e veprimtarisë inspektuese të strukturave të ISHU-së në nivel qendror dhe rajonal në fushën e inspektimit të ujërave;

ç) bashkërendon veprimtarinë e ISHU-së me organet qendrore dhe organet e tjera shtetërore në fushën e inspektimit të ujërave;

d) siguron kontakte me organet homologe dhe organizata të ndryshme, të huaja për zgjidhjen efektive të problemeve në fushën e inspektimit të ujërave, si dhe kryen veprimtari të tjera për plotësimin e detyrave të përcaktuara në legjislacionin në fuqi për inspektimin në këtë fushë;

dh) siguron zbatimin dhe kontrollin e zbatimit të akteve ligjore e nënligjore, që rregullojnë veprimtarinë në fushën e inspektimit të ujërave;

e) ushtron çdo funksion tjetër të përcaktuar në ligje të tjera të posaçme, që kanë të bëjnë me mbrojtjen e ujërave.

4. Kryeinspektori i ISHU-së i raporton drejtpërdrejt ministrit përgjegjës për ujërat, përveçse kur ministri ka përcaktuar shprehimisht, me urdhër, një njësi tjetër raportimi në aparatin e ministrisë.

5. ISHU-ja në nivel qendror ka këto funksione:

- a) planifikon dhe bashkërendon veprimtarinë e inspektimit;
- b) siguron unifikimin e praktikave të inspektimit, në shkallë vendi;
- c) informon publikun për veprimtarinë e inspektimit;

ç) jep mbështetje teknike, administrative dhe shkencore për veprimtarinë e inspektimit;

d) përgatit programin dhe raportin vjetor të inspektimit;

dh) zbaton aktet ligjore e nënligjore në fushën e mbrojtjes së rezervave ujore për menaxhimin e burimeve ujore sipërfaqësore dhe nëntokësore;

e) siguron zbatimin e praktikave të unifikuara të inspektimit për resurset ujore në nivel qendror dhe rajonal.

6. Përveç sa parashikohet në pikën 5 të këtij kreu, ISHU-ja në nivel qendror është përgjegjëse për kryerjen e këtyre funksioneve për të gjithë institucionin, përfshirë edhe degët në nivel rajonal.

7. Pranë ISHU-së në nivel qendror krijohet “Komisioni i ankimit të ISHU-së”, i cili drejtohet nga kryeinspektori.

8. Përbërja nominale e komisionit të ankimit, procedurat për shqyrtimin e ankimeve dhe mënyra e vendimmarrjes përcaktohen sipas legjislacionit në fuqi për inspektimin.

9. Komisioni i ankimit të ISHU-së ushtron funksionet në përputhje me afatet dhe procedurat e ankimeve, të parashikuara në ligjin nr. 10433, datë 16.6.2011, “Për inspektimin në Republikën e Shqipërisë”, të ndryshuar, Kodin e Procedurave Administrative dhe ligjin nr. 10279, datë 20.5.2010, “Për kundërvajtjet administrative”.

10. Degët rajonale të ISHU-së ushtrojnë veprimtarinë e tyre në territorin e qarkut përkatës dhe janë përgjegjëse për inspektimin në qarkun përkatës. Me urdhër të kryeinspektorit, inspektorët e një dege rajonale mund të ushtrojnë veprimtarinë e tyre edhe në territorin e një qarku tjetër, në bashkëpunim me degën rajonale përkatëse.

11. Degët rajonale të ISHU-së drejtohen nga drejtuesi i degës rajonale, i cili përfaqëson degën rajonale në marrëdhënie me të tretët në nivelin e qarkut përkatës dhe është përgjegjës për organizimin dhe bashkërendimin e punës për funksionimin, cilësinë dhe efektivitetin e veprimtarisë së degës së tij.

12. Përveç sa parashikohet në pikën 11 të këtij kreu, drejtuesi i degës rajonale:

a) jep autorizimin e inspektimit, në përputhje dhe në bazë të programit të miratuar të inspektimit;

b) vendos për shtyrjen e kohëzgjatjes së autorizimit, në përputhje me legjislacionin në fuqi për inspektimin, vendos për zëvendësimin e inspektorëve gjatë inspektimit, me përjashtim të rasteve kur urdhërohet nga kryeinspektori qendror.

13. Drejtuesi i degës rajonale i përgjigjet dhe i raporton drejtpërdrejt kryeinspektorit të ISHU-së, përveçse kur kryeinspektori ka përcaktuar shprehimisht, me urdhër, një njësi tjetër raportimi pranë ISHU-së në nivel qendror.

IV. STEMA DHE VULA ZYRTARE E ISHU-së

1. ISHU-ja identifikohet me stemën dhe vulën zyrtare.

2. Stema e ISHU-së përbëhet nga stema e Republikës me shënimet: “Republika e Shqipërisë, Inspektorati Shtetëror i Ujërave”.

3. Vula e ISHU-së ka formën dhe elementet e përcaktuara në pikën 2 të vendimit nr. 390, datë

6.8.1993, të Këshillit të Ministrave, “Për rregullat e prodhimit, administrimit, kontrollit dhe ruajtjes së vulave zyrtare”, të ndryshuar. Vula e ISHU-së në nivel qendror përmban edhe shënimin identifikues: “Inspektorati Shtetëror i Ujërave”, ndërsa vulat e degëve rajonale përmbajnë shënimin identifikues: “Inspektorati Shtetëror i Ujërave, dega rajonale e qarkut (emri përkatës i qarkut).

4. Vula e ISHU-së dhe vulat e degëve rajonale prodhohen, administrohen dhe ruhen në përputhje me legjislacionin në fuqi.

V. DISPOZITA TRANSITORE

Nëpunësit ekzistues të strukturës aktuale përgjegjëse për inspektimin e ujërave në Inspektoratin Shtetëror të Mjedisit Pyjeve dhe Ujërave transferohen pranë Inspektoratit Shtetëror të Ujërave.

VI. DISPOZITA TË FUNDIT

1. Vendimi nr. 46, datë 29.1.2014, i Këshillit të Ministrave, “Për krijimin dhe mënyrën e organizimit e të funksionimit të Inspektoratit Shtetëror të Mjedisit, Pyjeve dhe Ujërave”, shfuqizohet për pjesën e Inspektoratit Shtetëror të Ujërave.

2. Ngarkohet ministri i Bujqësisë, Zhvillimit Rural dhe Administrimit të Ujërave për zbatimin e këtij vendimi.

Ky vendim hyn në fuqi pas botimit në Fletoren Zyrtare.

KRYEMINISTRI
Edi Rama